



Kamis, 11 Juli 2024

Ogen : Sakaria 1:18-21



Empat Tanduk, Empat Pande Besi



Ngeluh i bas paksa kepiceten ukur, erbebe, dem i bas tekanen bage me nggeluh i pembuangan. Bangsa Isreal ndube kalak si ihagaken, tapi genduari i bas buangen. Pembuangan e jadi erkiteken ipemersikna ukurna, nilah i bas peraten Dibata nari. Ngeluh iteruh kuasa bangsa sideban. Ndauh i bas kuta kemulihen. Kemulian si sedekah enda jadi kinihagan pe runtuh. Erdandanken si e kuh me kiniseran sinialaken.

I tengah kecibal si bagenda rupana, keleng ate Dibata tetap kap lit. Dibata la erpuas-puas guna ncidahkan kekelengen e man bangsaNa. IsuruhNa me nabiNa guna nehken pedah arah pengenehnen e me Sakaria. Terhusus ogen wari enda kerna dua bagin: *sipemena iidah me empat tanduk*. Tanduk enda nuriken kerna kerna bangsa-bangsa doni si enggo ngkernepken kalak Juda, Israel ras Jerusalem. Janah *sipeduaken e me empat pande besi*, ertina kalak si reh mpebiar-biar ras ngeruntuhkan bangsa-bangsa si ngeradasken negri Juda dengen engkernepken pendudukna. Alu kata sideban pengenehen enda nuriken maka sope denga jadi sada bencana nandangi bangsa Dibata enggo leben i bereken Dibata pengenehen arah nabiNa. Enda me kata persinget segelah bangsa enda metenget dengen pentar ngalaken situasi. Pengenehennen si ituduhkan Dibata e, bage me pagi jadona. Biasana kai si ibelasken Dibata kerina e jadi. Saja ope jadi enggo leben ipebetehkenNa, gelah tetap ersikap. Bage me kerna kekelengen Dibata i bas mpersingeti bangsaNa.

Nulih kita ku kegeluhen si teptep warina, si gejam maka Dibata make kataNa guna mereken persinget man banta. Kata e jadi sada alaram segelah mediate, la mejarjar dengen jadi pelajaran si penting bas kegeluhen. Bagi empat tanduk ras empat pande besi bage me kegeluhen paksa enda; doni enda ersura-sura guna engkernepken kinitken ras mpebiar-biar kegeluhen. Seh maka maun igejapken lanai lit si tenengna i ja pa pe. Janari pe rehen sierbahanca ceda, mbiar, aru ate ras sidebanna. Guna si e begikenlah sora Dibata e, ipersingetiNa kita teptep warina arah kataNa.

“Persinget Dibata mbelin kel gunana, dengkehkenlah”





